

# «Cun sajettar lufs n'èsi betg fatg»

Ils arguments dal comité grischun cunter la revisiun da la lescha da chatscha



**Il luf – l'animal che procura peremoziuns e che stat en il focus tar la votaziun davart la lescha federala da chatscha, sur da la qual vegn votà ils 27 da settember 2020.**

FOTO PETER DETTLING

DAD AUGUSTIN BEELI/FMR

**■ Per la chatscha grischuna na sa midia nagut, sch'ins acceptia u refuse schia la lescha en votaziun ils 27 da settember. Quai ha il comité grischun per in na a la lescha da chatscha declarà ier ad ina conferenza da medias a Trin.** I dovria ina regulaziun dals lufs, quai constettia, han tut ils traiss referents accentuà en lur posiziuns. En il Grischun datti actualmain 37 lufs, la gronda part en Surselva. Sch'i dettia problems cun quest dumber crescent, stoppiant ins prender mesiras. Cunter quai na sajan els betg, han Sandra Locher Benguerel, Armando Lenz e Martin Kreiliger declarà gievvia damaun a Trin. Il comité grischun cunter la revisiun da la lescha da chatscha ha preschentà arguments pertge ch'els s'opponan tuttina al project.

## L'effect dal luf sin ils tschiervs

La moziun oriunda da cusseglier dals chantuns Stefan Engler fissa stada moderada e tuts avessan pudi viver cun quhella, ha Sandra Locher Benguerel ditg. I

n'avess betg duvrà ina modificaziun, «co ch'ins ha la finala midà quella revisiun, è inacceptabel», ha la cussegliera naziunala punctuà ier a la conferenza a Trin. Per l'ina avria la lescha las portas per 26 soluziuns singulas, mintga chantun possia far tge ch'el veglia cun sittar animals protegids. I na gajja betg sulet per la regulaziun dal luf, mabain per sajettar lufs-tschiervs, casturs e iruns grischs.

Strusch che la revisiun fissa acceptada, ils 27 da settember, stuess il Cussegli federal entschaiver a s'occupar da bleras novas intervenziuns per sajettar quels ed auters ani-mals protegids. «Gia oz lubescha la lescha d'eliminar animals che fan donns, dar dapli cumpetenzas n'è perquai betg necessari», ha la cussegliera naziunala maneggià.

## Ils tschiervs fan grond donn

Martin Kreiliger, il mainagestiun dal Project Guaud da muntopna, ha menziona in grond problem ch'il Grischun ha dapi onns en ils guauds: La populaziun creschenta da tschiervs fa gronds donns



**Senza saivs na crescha nagut : La foto d'ina surfatscha sur Curaglia mussa l'effect che memia blers tschiervs pon avair sin il guaud da schurmetg. Uschia po il luf esser in partenari dal selvicultur encunter la surpopulaziun da tschiervs.**

MAD

als guauds da protecziun. Cun gronds sforzs emprovian ils organs forestals da tgirar plantaziuns giuvnas, «la sulvaschina è pli ferma», ha Kreiliger ditg. L'aviez, il ruver ed autras specias impurtantias na pon betg crescher, mintg'onn datti donns considerabels. Ils guauds da protecziun, ch'en d'impurtanza existenziala per il Grischun, ses abitants e l'economia, patitschan fitg.

## Sustegnair l'agricultura

La populaziun actuala da 20'000 tschiervs saja in' excellenta maisa cuverta per il luf. Questa enorma spesezza haja attratg il predatur. La populaziun creschenta da lufs gajja alura er parallel cun la populaziun creschenta da tschiervs, ha l'expert dal guaud declarà. «Il luf ha clearamain in effect positiv per ils guauds da protecziun, grazia ad el gartegia da reducir ils donns da ruier. I drova ina regulaziun dal luf, la lescha na resguarda dentant betg l'aspect dal guaud da protecziun. Perquai èsi memia baud per ina vasta reducziun da quest carnivor», ha Martin Kreiliger argumentà.

## Cun sajettar n'è anc betg schlià il problem

Sco terz dal comité cunter la lescha da chatscha ha Armando Lenz discurrì. Il mainagestiun da la Pro Natura ha purtà ils arguments da la protecziun da muntneras. Cun simplamain sajettar lufs na saja il problem structural da l'agricultura betg schlià, ha Lenz ditg. Ins stoppia sustegnair l'agricultura, quai saja cler per tuts, dentant stoppiant ins era vesair il fatgs. Per l'ina sa reguleschia in triep stabel da lufs sez, ins stoppia dal rest far attenziun da betg sajettar amez in triep ed eliminar in dals animals alfa. «Alura dati in problem anc pli grond. E damain lufs na mutta betg damain stgars», ha Armando Lenz concludì.

Ils exempels dals chantuns Vallais e Berna mussian quai: En il Vallais hajan 18 lufs stgars 600 nursas, en il chantun Berna cun 8 lufs stabels hai dà 100 stgars. En il Grischun mussa la statistica che 37 lufs han stgars 270 animals da niz. En vista a 4200 nursas che na turnian betg da l'alpegiaziun, sajan ils predators betg ils culpants principals.